

Leetal ya eyya Saak naakiice ya Saak Waah wa weeyem wa ti leetal eyye

Aluu éyeniin ya keeyem ka ti káasiitan, kicanaa. Unaa unka ti ékey káasiitan leetaloo ya eyya Saak naakiice ya.

Ayme ayem Saak? Eehe nkasoke unaa nii, pikee pa akina ayem Yéesu Krista atuwoo, eeyeniye ya áhampaatiin a ati canku ya eeyem ya Jerusalem.

Peyme naayeniye ta naakiice yo ta, niñ teyme naakiice yo, hikina káyisanut ho unaa.

Pakayme naakiice leetal eyye? Leetal eyye, “písii pa ñaasuwan niñ pákasupak paka pakati Pútuun pa keehancalooliye ka ti púlunta pa púloon” naakiice yo (1:1). Pikee pa poko kayem Pusuwif pa Pikeleecen pa, niñ ekina tom Pikeleecen pa púloon keehancalooliye ka ti púlunta pa.

Weyme utaa ke hikaw ti leetal eyye?

Híyaañ ha, hikina hiyem káýinan niñ pawenal (1:22-27; 2:14-25). Asok náayinanaa, pawenali piñañaañan káyisan nii an éeyinane.

Hísupiyenu ha, hikina hiyem ecohato (1:5-8; 3:13-18). Asok Pútuun pa ínsuum po niñ uluumaa po ecohato kati puwufan yo unaa, ecohato eyya ammeya nii, éfeetintinjan unaa ti elon eenape, néetintinjan unaa ti pálafooli, néetintinjan lompo unaa ti pásuuma.

Híhaaciyenu ha, hikina hiyem kusaanum ka nin keeleke ka keeyem ka ti canku ya (1:9-11; 2:1-7; 5:1-6). Asok kaafisakanool timpi kitaako ti pututa kusaanum ka nin keeleke ka. Kusaanum ka kañañaa kaamankool keeleke ka pinap, nkánawuno nii, hisaanumate ha hiteyii efimpihimuus.

Hípaakiilenu ha, hikina hiyem kacocokan híleeluuf (1:19-21; 3:1-12). Asok nin áayinanaa, an óo an éeyinane añañaañañ “hicasu ti káasiitan pakakee paka, pale timpi acas ti káakup, timpi lombo acas ti káñiken (1:19).”

Hísakiyenu ha, hikina hiyem kúnuul nin hilonu páciite (1:2-4,9-12; 5:7-11). Asok naaloonaa kúnuul, taak pásuuma penfakat. Káyinan ka kitii, efikihan nkitaake sempe ti kamukut ka kitii.

Heewase ha isak nin hoonool, hikina hiyem kaluum (1:5-8; 4:1-3; 5:13-18). Asok “kaluum kiti eecoonoole kitaakaataak sempe nkíyini íhinu heemaka (5:16).” Ooto an éeyinane añañaañañ kaluum.

Añe éfuusiyaa ti leetaloo ya eyya Saak naakiice ya eyye, nuunaa úsiitanaa yo. Álímaati Pútuun pa pípankin kunuu unaa, álímaati Pútuun pa lombo piyankanan unaa kati úsiyaa leetaloo eyye fa nuuyemaa fa ti káasiitan. Pútuun pa pikat unaa. Apalaka.

Kakican ka

¹ Inci Saak, amiikan a ati Pútuun pa nin ati Ateeteyo Yéesu Krista, yem ti hikiicu leetal eyye. Kicanaa aluu písii pa ñaasuwan nin pákasupak

paka pakati Pútuun pa keehancalooliye ka ti púlunta pa púloon.*

Káyinan nin ecohato

II Aluu pakanam ti káyinan, nin páciite óo páciite púnowiyoo taaluu, nitaak pásuuma penfakat.

III Weyme uwune inci insok: “Nitaak pásuuma penfakat?” Kaatuko nímeyimeyi nii, nin káyinan ka kitaaluu kutowiyaa ti páciite, efeewun innihan innimukute.

IV Antún innimukutaa fo ti pikelan, fiyuu efiniyeno pakan kéetuuniye fanfan, etinisoolah waah.

V Nin akee ti aluu asoolahaa ecohato, añan̄aa kaluum Pútuun pa, Pútuun pa efipuwunoo, kaatuko mpuwunwun pakan paka púloon nin pásuuma peewatanut an.

VI Pale añan̄aa kaluum ti káyinan, timpi an̄atool, kaatuko an an̄a nan̄atool anakoolaa-nakool nin kúsuu kiti kaatii enka eyam ya netowo ti káaseepin neewanan.

VII Oom an añan̄ut káamiilool nii afaasa waah wéefulii ti Ateeteyo,

VIII kaatuko akina ati kunuu kúsupak, kunuu-woo kipepanantoo ti waah óo waah ewwa náhin.

Palek nin hisaanumate

IX Náayinan̄aa illek, séepin úpantiyi kamma Pútuun pa mpisilanuu.

* **I:I 1:1** Pikee pa poko kayem Pusuwif Pikeleceen pa, nin ekina tom Pikeleceen pa púloon keehancalooliye ka ti púlunta pa.

X Pale naayeniyaa usaanum, séepin úpantiyi kamma mpuwananuu, kaatuko aafamuus samat nii páluufeenal piti káaheeni kiti elampa.

XI Niŋ caanak ca cífuliyoo niŋ pasowe etenco, incisowan káaheeni ka, páluufeenal etenko mpunowal, pawalle etenko mpícim. Fo lombo incuke ti kusaanum ka: éfikacim ti pututa páhin pa piteyii.

Kamukut niŋ híluuŋu

XII Pásuuma piyeno ti eemukute ya ti páciite, kaatuko niŋ amukutaa, afaataak cooy ya eteyoo, ekina eyem eloŋ ya eepayantoo ya eyya Pútuun pa mpíyinanane ya nii, efipuwufan yo kéelafiye po ka.

XIII Eeyem a ti híluuŋuyee, timpi asok nii: “Pútuun pa piyemaam ti híluuŋu.” Kaatuko Pútuun pa púluuŋantee ti íhinu heenaput, púluuŋantoo lombo an.

XIV Pale an óo an, kunuu ka kiteyoo keenaput ka, kikina nkúluuŋoo nkuwun naakuucee samat nii fa yoon nekuucee fa niŋ maali.

XV Niŋ fúlaa toko, kunuu keenaput nkúpukii kaamuuyen, apan kaamuuyen, niŋ kíyankiyoo nkúpukii eket.

XVI Aluu pakanam ti káyinan payenka inci íllafiye ka, timpi nicaakool faŋ aluu:

XVII Waah óo waah weenape ewwa innisa niŋ waah óo waah weetempiye pántoon ewwa nkawufan aluu, patiila núufulii. Eehuu níhiwanoonii hípifulii ti Paapaa ya Pútuun pa peeliile pa caanak ca niŋ picaaŋaŋ pa. Pútuun

pa piyesiyantoo, pucukut lombo nii hísaalumant eeha nihiyeso niŋ caanak ca citeeniyaa.†

XVIII Ti pásuuma etempo mpuwufane unaa elon pínapii ti hilim etempo heeyem ha tooña ya, ancuk unaa uyeniyaa kéecooke ka ti waah wa púloon ewwa Pútuun pa mpiliile wa, samat nii pamaañal pa púcook pa empa an nacoop pa ti ekumpan ya enfakat ya etempo.

Hísiyu niŋ ihinu

XIX Aluu pakanam ti káyinan payenka inci íllafiye ka, nímeyi nii: An óo an añaŋaa hicasu ti káasiitan pakakee paka, pale timpi acas ti káakup, timpi lombo acas ti káñiken,

XX kaatuko káñiken kiti an kúcoopiyantoo heecoonoole eeha Pútuun pa mpílaŋiye ha.

XXI Ooto nikatan pámiiloolal pa peenoota pa púloon, innikatan lombo páhinal pa peenaput pa peeyem pa pan óo pan. Niwanan faŋ aluu innicoon hilim ha eeha Pútuun pa mpusuke ha ti saan aluu, hikina hiyina kafakan aluu.

XXII Timpi nísiitan hilim ha hiti Pútuun pa kensen, pale níhin samat nii fa nihiroke fa. Niŋ níhinut fo, kincaakool faŋ aluu inniyaake.

XXIII Kaatuko aŋa násiitan hilim ha hiti Pútuun pa apan áhinut eeha nihiroke ha, acukaacuk samat nii an eeyem ti ecukaloolo naacuk faŋoo fa naacuke fa,

† **I:XVII 1:17** Niŋ ekina tom: “Pútuun pa piyesiyantoo, pitaakut éniimaan.” Niŋ ekina tom: “Pútuun pa piyesiyantoo, pucukut lombo nii caanak ca enca íncihin ca hísaalumant inciteeniyaa.”

XXIV te niŋ apayaa ecukaloolo naakaay, toko-toko naafil puume naanakoole.

XXV Pale aŋa natah kunuuwoo pinap ti hilim ha heesiŋanee ha heetempiye ha tak, hilim eeha nihifakan ha pakan paka ti himiikanate, niŋ acokaa piyank, Pútuun pa efipisampanoo ti waah óo waah ewwa náhin. Oom an ásiitanantoo kati afil, pale kati náhin eeha nihisoke ha.

XXVI Niŋ an ti aluu acokooliyaa nii eecoke piliit pítin pa piti Pútuun pa apan ayinaat kacocokan híleeluufuyoo, oom an kincaakool faŋoo naayaake, káyinan ka kiteyoo kitaakut nafaa.

XXVII Pútuun pa Paapaa atuunaa, eeha mpu-coke ha nii káyinan coopcoop, hikina hiyem kaamankool keeyem ka ti kúnuul: písikateen pa niŋ piyaanŋat pa payenka pákayiinii keekete ka, te timpi nikat hiti púlunta pa hípitifan aluu.

II

Hikituyee ha hiti kaafisakanool

^I Aluu pakanam ti káyinan, páawoo ti Ateeteyo Yéesu Krista ati hamake ha inniyinane, ooto timpi nifisakanool pakan paka.

^{II} Nísiitan hícantitu eehe: hikee hinoom inniconcooliye ti éluumuma ya etaaluu: akee áyiin náakey la inniconcooliye la, náasankin naawaso ekop eti sanoo; áyiin lombo eeleke náakey ti oom éyeniin naawaso wañ weelecate.

^{III} Innipaalo áyiin a éesankine ya innisokoo: “Ehe híkon he!” inniyisanoo híkon heetempiye, pale innisok eeleke ya: “Siinjo pa!” niŋ ekina tom: “Páho le!”

IV Nin níhinaa fiyuu, fo nifisakanoolut pakan paka? Fo níyenoonyoot píhina kíiti keefinte kunuu?

V Nísiitan, aluu pakanam ti káyinan payenka inci íllafiye ka! Fo Pútuun pa pimamalut keeleke ka ti púlunta pa kapiyeno usaanum ti káyinan, nkatoon cáwii enca mpíyinanane ca nii efipuwufan co kéelafiye po ka?

VI Pale aluu nicokantoo keeleke ka pakan! Fo kusaanum ka tom nkakallan aluu? Fo poko tom nkáhuun aluu pati éhinuma ya kíiti?

VII Fo poko tom lompo nkateñal caacaw ca ceewalla ca citi Yéesu Krista aña inniyem a teyoo?

VIII Antún naakalanáa ti hilim ha hiti Pútuun pa, hisok: “Láfi akinooli samat nii fa állafiye fa fañi.”✧ Eehuu hiyem hilim ha heesiñanee ha hiti cáwii ca citi Pútuun pa. Nin nítuulaa ho pánipani, niwenaawen pinap.

IX Pale nin nifisakanoolaa pakan paka, kaa-muuyen inniyaake, apan hilim ha heesiñanee ha nihisiñan aluu ti pisiya kamma ínnituulut ho.

X Kaatuko an óo an éetuule hilim ha heesiñanee ha púloon pale naanow ti hoonool, ti kilim ka púloon cew naamuuyene.

XI Kaatuko Pútuun pa peesoke pa: “Timpi hinto nin aal eenimiye” pusoke lompo: “Timpi muk an ti pásuumayi.” Fiye naahintiit nin aal eenimiye pale immuk an, áatuulut hilim ha heesiñanee ha.

XII Ooto níkup inniwen samat nii pakan keeñañee íhinuyee kíiti ti hilim ha heesiññanee ha eeha nihifakan ha unaa ti himiikanate ha.

XIII Kaatuko eetaakut a paket hikaw, Pútuun pa lombo etipitaak teyoo paket hikaw. Pale paket hikaw naheek kíiti.

Káyinan niñ pawenal

XIV Aluu pakanam ti káyinan, niñ an asokaa nii ataakaataak káyinan apan pawenaloo pinaput, eyyeyme nafaa eyem toko? Fo káyinan enkuu éfikiyiniyoo kafakan?

XV Nísiitan hícantitu eehe: akee ti aluu kéeyinane ka ataakut pásooliyal, ataakut paliyal peenone hinak óo hinak.

XVI Akee ti aluu naasokoo: “Kásuumaay kiyeno naawe! Kaay monaamon sóolo punonk, illi aapisiit!” Inníhinaa fiyuu, kilim enkuu weyme nkíhine nafaa niñ aawunutoo aña naasoolahe ya kati alon?

XVII Fo lombo incuke ti káyinan; káyinan lamma etenko, niñ anapoolut niñ pawenal ake-taaket.

XVIII Pale pikee pa akee naasok: “Awe káyinan antaake, inci intaak pawenal.” Oom an inci fasokoo: “Yísanam káyinan ka kitii keetaakut ka pawenal, inci íyyisani káyinan ka kutoom pínapii ti pawenalam.”

XIX Fo áayinanaayinan nii Pútuun poonool pitaakiye? Naasokaa ee, páni ansoke. Pale háati kísaalumant ka kíyinanaayinan eehuu, apan nkikikilan kamma ewatate.

XX Awe esonj eyyuu! Fo áalafilafi áapiyisane nii káyinan, ninj anapoolut ninj pawenal, ataakut nafaa?

XXI Fo Abraham maamaa atuunaa me? Puume Pútuun pa mpucokoo nii eecoonoole? Fo neetaat kamma pawenaloo, ta naapookut ta kaawaaseen po añiinoo Isaak ti kaaciin ka?☆

XXII Aacukaacuk, káyinan ka kiteyoo kinapoolaa-napool ninj pawenaloo, nkútuuno kamma pawenaloo.

XXIII Fiyuu heekiicee ha ti hilim ha hiti Pútuun pa nihitaakiye, hisok: “Abraham áyinanaayinan ti Pútuun pa ekina ewune Pútuun pa mpucokoo nii eecoonoole.”☆ Naayonkalee áwii Pútuun.☆

XXIV Nicukaacuk, pawenal an mpuwun Pútuun pa mpucokoo nii eecoonoole, neetaat káyinan ka kiteyoo lamma.

XXV Fo lombo incuke ti Lahap, aal a ahaañiya ya, pawenaloo mpuwun Pútuun pa mpucokoo nii eecoonoole, ta naawanane ta lateyoo pakati Israyel keepoñee ka naayankananii kapinap pi-kee pítin kati kafak kápuful ti saatee ya.☆

XXVI Samat nii an, ninj asuunjutut naaket, fo lombo incuke káyinan ninj ataakut pawenal naaket.

III

Kacocokan hîleeluuf

I Pakanam ti káyinan, timpi nimeenj keeyem pikalanjana hilim ha hiti Pútuun pa, kamma

☆ II:XXI 2:21 Púcook 22:1-18 ☆ II:XXIII 2:23 Púcook 15:6

☆ II:XXIII 2:23 2 Heetaakiye 20:7; Esaaya 41:8 ☆ II:XXV 2:25

Josuwa 2:1-24

innimeya nii unii pikalaŋana pa éfuuhinee kíti pihanŋ pakakee paka.

II Unaa púloŋ nuunowaanow ti kaamuuyen ti hícump pawenal. Pale an óo an aŋa anowantoo ti pákupal, an a aŋuu an éetuuniye fanfan, náayini kacocokan eniinoo púloŋ.

III Inkéyyoo ti efalinc, niŋ aasoofaa nikopu niti mañ ti putum eteyyo kati éhin fa állafiye fa, áafayini kaayesanool enii eteyyo púloŋ.

IV Nisincan lombo ñiteen ñenfakat. Háati fa naafome fa niŋ fa hiyam henfakat níhitunkoo fa, anama ya, niŋ ékusu enkilis nayesanool po pan óo pan pa náalafiye pikaayu.

V Fo lombo incuke, híleeluuf waah wenkilis ti enii, pale námakiyanoolo-mákiyanoolo kiti henfakat. Nísiitan, kaaleew kenkilis, áyiniyini kacokan elampa enfakat.

VI Híleeluuf lombo, acukaacuk nii kaaleew, hikina hiyem ékinuma ya eti heenaput ha púloŋ eewasee ya ti enii unaa. Hikina nihilecatan enii ya púloŋ. Nihicokan eloŋ ya púloŋ seemak, kaatuko Seetaani ya faŋ eteyyo necokan ho seemak.

VII Pakan paka káyiniyini kacocokan élukuleen óo élukuleen: púlukuleen piti elampa, púlukuleen empa mpúhuunoolo, púlukuleen peekine ti man niŋ pusuwa,

VIII pale an ayinaat kacocokan híleeluuf. Híleeluuf apilanantoo anaput, naameeŋ pisik piti himuku.

IX Niŋ híleeluuf núumulaa Ateeteyo Paapaa atuunaa, niŋ hikina lombo nuuñanaa pakan

paka payenka Pútuun pa mpiliile ka ti pacuk etempo.

X Ti putum pa poonool puu núumulaa nuuñanaa. Pakanam ti káyinan, eehe hiñañut.

XI Man meeneena niñ miti musuu, fo káyiniyini éfulii ti káapun koonool?

XII Pakanam ti káyinan, fo sootoo áyiniyini hitaaku olif, niñ fotom enuun eti wiiñ áyiniyini hitaaku sootoo? Fo lombo incuke káapun kiti musuu kiyinaat hitaaku man meeneena.

Ecohato éefulii patiila

XIII Ayme taaluu acohatiye naataak kunuu? Ayísan ho ti pawenal pa piteyoo peenape pa, náhin páhinal peenape ti ewananoolo ya eteyoo. Fiyuu áfaayisan nii akina eecohatiye.

XIV Pale niñ aamankaa ti yaani paheeka penfakat niñ pámiiloolal pitii lamma, timpi mákiyanoolo ti pákupali niñ ekina tom incaam impook tooñaa ya.

XV Oom echato éfuliyoot patiila pale t'etaam, éfuliyoot lombo ti káyinan pale ti Seetaani ya.

XVI Kaatuko la taake pakan pakati paheeka niñ pámiiloolal piteyii lamma, toko enakanoolo lak intaak pawenal óo pawenal peenaput.

XVII Pale echato ya éefulii ya patiila, eeha nécook ha ewufan hiyem yaan eekuule. Niñ fúl原因 tóko néhin unaa pakan kéelafiye kásuumaay, pakan keemone nkataak kunuu, nécoopii paket hikaw penfakat néepukii pawenal peenape. Naataakaa echato eyyuu, aatifisakanool pakan paka, aatiyeno lombo nícuf.

XVIII Pikaka koot kiti kásuumaay, payenka nka-suk ka kásuumaay, efikamaañ papukal pa piti pucoonool pa.

IV

Páawiyool niŋ púlunta pa

I Weyme nuuwun pítaakool niŋ píñakalool mpitaako ti pututa aluu? Fo neetaat kamma pásuuma pa piti eloŋ ya peeyem pa ti hikam ti saan aluu?

II Innílafilafi waah pale nitaakantoo, fiye in-nimuk. Inninaŋ kunuu aluu ti waah uti an pale niyinaat wo hitaaku, fiye ínñiñakalool innitaakool. Caham nitaakut kamma innilu-umut Pútuun pa.

III Háati fa inniluum fa, nitaakantoo kamma inniluum ti pámiiloolal peenoota, kaatuko in-niluumaa, inniluumluum kati níhin héesuume ha aluu.

IV Aluu keecuke ka nii pakaal keelehut ti pákayiinii! Fo nímiit nii páawiyool niŋ púlunta pa piyem pikamool niŋ Pútuun pa? Ooto an óo an eemamale páawiyool niŋ púlunta pa afaayeno akamool Pútuun pa.

V Fo cukaacuk aluu nii heekiicee ha ti pakiical pa piti Pútuun pa hiti kensen? Hisok nii, Kunuu enka Pútuun pa mpuwufane ka kati kikin tuunaa, Pútuun pa ti pasowe mpílaŋfiye ko.*

VI Pale panap empa Pútuun pa mpíyisane pa unaa pihana empuu. Ekina ewune hilim ha hiti

* **IV:V 4:5** Niŋ ekina tom: “kunuu enka Pútuun pa mpuwufane ka kati kikin tuunaa, kimeenjaameen pasowe.”

Pútuun pa nihisok: *Pútuun pa pupookaapook an éeseepinooliye pale mpíyisan panap etempo ti an eewananolliye.*☆

VII Ooto nituul Pútuun pa. Nipook Seetaani ya, efeetey aluu.

VIII Níkey nipikol Pútuun pa, mpíkey lompo pupukol aluu. Aluu pumuuyena pa keetaake ka kunuu kúsupak, niñow sipees aluu innikuulan saan aluu!

IX Niyeno ti kúnuul innikoonj innicoolan. Niye-san caalenken ca citi aluu ti weenjoot, pásuuma pa piti aluu ti páciite.

X Niwanan fañ aluu hátikin Ateeteyo, náaseepin aluu.

Káahinaati kíiti akinooli

XI Pakanam ti káyinan, timpi níkup heenaput ti akee taaluu. An óo an éekupe heenaput ti áwiyoó ti káyinan nin fotom náahinoo kíiti, ákupaakup heenaput ti hilim ha heesiinanees ha náahin ho kíiti. Náahinaa hilim ha heesiinanees ha kíiti, aaneetaat ho ti hítuulu pale íhinu ho kíiti ayyaake.

XII Pútuun pa lamma mpisiinan hilim ha heesiinanees ha, pikina lamma etempo mpíhin kíiti, pikina piyina kafakan an nin káapucalooloo. Pale awe, awe yem ayme aakati hín akinooli kíiti?

Káaseepinooliyaati

XIII Fiye nísiitan, aluu keesoke ka: “Fíyooy nin ekina tom kacom efuukaayaa ti ekee saatee nuutaakaa po etiiil ti safaali nin hitaaku mañ.”

XIV Apan nímiit eeha efihitaako kacom. Weyme uyem elonji? Nicukaacuk nii káatiŋu enka nkúfulii nkihancaloolo mpacas.

XV Eeha inniñañe ha hisoku hiyem: “Niŋ súumaa ti Ateeteyo, efuulonŋ núuhin eehe niŋ eeha.”

XVI Pale fiye, émakiyanoolo inniyaake ti henfakat eeha innikaakaay ha íhinu, innihin ho ti kalitan pisaña aluu. Emákiyanoolo eyyuu púloonŋ enaput.

XVII Ooto niŋ an ameya heenape eeha naañañe ha íhinu apan áhinut ho, hikina kaamuuyen teyoo.

V

Kákupananee ka kiti kusaanum ka

I Fiye níkey, aluu kusaanum ka, nikoonŋ ínnicoolan kamma kúnuul ka keeyem ka ti ékey ti aluu.

II Hitaaku ha hitaaluu híhutaahut, cemmek neeli wañ wa utaaluu.

III Pisanoo pa niŋ púkotifoloo pa pitaaluu pise-maasem. Hisemu etempo éfihiyisan kaamuuyen ka kitaaluu nihinook aluu, nihili siniin aluu samat nii seemak. Innimankmank hitaaku apan púlunta pa umpa ti ékey hipayu.

IV Nísiitan! Cooy eyya innipooke ya cooy píhina pa pakati ukit wa utaaluu yoopiya ti hiceeku. Hiceeku ha hiti pumaaña pa pakataaluu pucolaacol ti kaanuu Ateeteyo ati sempe sa púloonŋ.

V Nikinaakin ti etaam ye ti elonŋ enfakat eti pásuuma aluu lamma. Inniluukan fanŋ

aluu; fiye ínnyenoonii samat nii púlukuleen peekaakaayee hitaaju.

^{VI} Inníhin kíiti innimuk éehinut a likee, apan apookut aluu.

Kamukut ti kúnuul

^{VII} Pakanam ti káyinan, nitaak kamukut fo ta Ateeteyo áfaañhoonii. Nisincan fa ayaya nátuul fa ti kamukut etaam ya epupuk papukal pa empa naasoolahe pa, ti púcook etiil ya niñ pikelan etiil ya.

^{VIII} Aluu lombo nitaak kamukut innisiijo fat, kamma ékey ya eti Ateeteyo néelohanii.

^{IX} Pakanam ti káyinan, káakumutool timpi kitaako ti pututa aluu ancuk timpi níhinee kíiti. Nisincan, áhina ya kíiti oopa asiijiye ti putum pa!

^X Pakanam ti káyinan, nínawuno piyaa-makoola pa kéekupe ka ti caacaw ca citi Ateeteyo. Kacukaacuk kúnuul nkamukut, níyipenanii.

^{XI} Keemukute ka, samat nii fa innimeya fa, ucokiicok nii pakan keesampanee. Nísiyaasi kamukut ka kiti Jóob, ínimeyi eeha Ateeteyo naawufanoo ha ti pikelan. Ateeteyo ameenjaameen paket hikaw niñ panap.

^{XII} Pakanam ti káyinan, ti enkuu púlooj timpi nisintoolo ti patiila niñ fotom t'etaam, timpi nisintoolo ti waah. Eeha inniñaje ha hisoku lamma hiyem “Ee” niñ ekina tom “Haani”. Ancuk timpi nisiñanee ti pisiya.

Kaluum keeluumee niñ káyinan

XIII Fo akee ti aluu oopa ti kúnuul? Aluum. Fo akee oopa ti pásuuma? Acook kícimu kiti hímulu.

XIV Fo akee ti aluu éekuúñe? Ayonkal ñíhampaatiin ña pakati canku ya kapulumoo, nkanucóo niñ munucu ti caacaw Ateeteyo.

XV Kaluum keelumee niñ káyinan efikifakan éekuúñe ya; Ateeteyo afaalitanoo. Iyyema amuuyenaamuuyen, afaaponketee.

XVI Ooto nikamanool umuuyen wa uti aluu, inniluumool ancuk níkuuñanee. Kaluum kiti eecoonoole kitaakaataak sempe nkíyini íhinu heemaka.

XVII Elí ayaamakoola ya an samat nii unaa. Naacok ti kaluum etiil ya timpi énupii ántuñ enuput fo sitiil síhaaciil niñ kancañ.

XVIII Nene aluum, útiñu wa núunupanii etiil, etaam ya néepukii papukal.

XIX Aluu pakanam ti káyinan, niñ akee ti aluu akatanaa tooñaa ya apilinco, akee náañahaniyoo,

XX ámeysi eehe: niñ an áfulaniyoo amuuyena ti pilinco pa empa naayeniye pa tempo, afaafakanoo ti eket naawun umuuyen weemeenje upuponketee.

Kuloonaay
Karon: Kuloonaay (Portions)

copyright © 2018-2025 Wycliffe Bible Translators, Inc.

Language: Karon

Contributor: SIL International (in Africa)

All rights reserved.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

404e2c05-c6eb-5f56-8cae-50a5b595ef9a